

Sogn og Fjordane fylkesbibliotek – Årsmelding 2011

Sogn og Fjordane fylkesbibliotek er eit service- og utviklingsorgan for biblioteksektoren i fylket, og skal medverke til lokal bibliotekutvikling og vere ein viktig aktør i kulturfylket Sogn og Fjordane.

Verksemda ved fylkesbiblioteket blir i stor grad styrt av «Strategisk plan for bibliotekutvikling i Sogn og Fjordane 2011-2014», vedteken i desember 2010. Bibliotekutviklinga blir her delt inn i tre hovudområde; Struktur og organisering, Kompetanse og Innhald og tenester.

Struktur og organisering

Fylkesbiblioteket arbeider for samarbeid og fellesløysingar på tvers av kommune- og forvaltningsgrenser slik at innbyggjarane i regionen får best moglege bibliotektenester. Dette kjem til uttrykk i samarbeidstiltak som "*Samsøk Sogn og Fjordane*" (<http://sf.samsok.no/cgi-bin/samsok-sf>), ein felles søkeinnangang til bibliotekbasane i fylket, der til no 23 kommunar, høgskulen og ein del vidaregåande skular er med.

For å betre medieflyten i fylket, og gi lånarane betre tilgang til dei samla biblioteksamlingane, har fylkesbiblioteket i 2011 arbeidd for å etablere ein transportordning mellom biblioteka. Kravspesifikasjon og anbodsdokument er utarbeidd, vi håpar å få på plass transportordninga i første halvår 2012. Med i samarbeidet er fylkesbiblioteket, 24 kommunar og høgskulen.

For ytterlegare å satse på utvikling av samarbeid mellom biblioteket, har fylkesbiblioteket søkt og fått tilskot frå Nasjonalbiblioteket på kr. 400 000 for 2012 til prosjektet "*Saman for framtida*". I prosjektet ynskjer ein å kartleggje mulegheiter for og motivere biblioteka til tettare samarbeid.

I tråd med utgreiinga "*Fylkesbiblioteket si rolle framover*" har ein i 2011 fått på plass ei partnerskapsavtale med Førde kommune, der Førde bibliotek tek på seg nokre driftsoppgåver fylkesbiblioteket har hatt (fjernlån, lokalsamling, classesett), slik at fylkesbiblioteket i større grad kan reindyrke si rolle som utviklingsaktør. Det vart og vedteke at fylkesbiblioteket skulle flytte kontorstad til Storehagen Atrium, saman med kulturavdelinga, men framleis leige magasin for mobilsamlinga og eit kontor i Førdehuset.

Kompetanse

Kompetanseheving blant bibliotektilsette er eit anna viktig satsingsområde. Sogn og Fjordane fylkesbibliotek arrangerte i 2011 ti kurs med til saman 185 deltakarar frå bibliotek- og skulesektoren. Eit kurs i formidlingsteknikk vart støtta av Nasjonalbiblioteket.

Fylkesbiblioteket har gjennomført ei kompetansekartlegging av dei bibliotektilsette i fylket. Med ein svarprosent på 72 har vi eit godt utgangspunkt for å danne oss eit bilete av kompetansen i biblioteka i fylket. Arbeid med å analysere svara er i gong og skal resultere i ein plan for kompetanseutvikling.

Innhald og tenester

Fylkesbiblioteket brukar nettet aktivt i arbeidet mot brukarane. I samarbeid med ABM Sogn og Fjordane utvikla fylkesbiblioteket ny heimeside ved bruk av den frie programvaren Drupal. Fylkesbiblioteket er også på facebook og twitter, og hadde ved årsskiftet høvesvis 132 og 166 tilhengjarar/følgjarar. Sogn og Fjordane, Hordaland og Møre og Romsdal har ei felles facebook-side for bokbåten, og denne hadde ved årsskiftet 218 tilhengjarar.

Fylkesbiblioteket har fått tildelt kr. 124 000 frå Nasjonalbiblioteket til å utarbeide *Forfattarvev for Sogn og Fjordane* – ei nettside med presentasjon av lokale forfattarar. Denne sida skal vere ferdig til bruk i løpet av 2012.

Som ledd i bibliotekutviklingsarbeidet reiser fylkesbiblioteket gjerne ut til biblioteka for rådgjeving og hjelp. I 2011 vitja vi 5 bibliotek, tema har bl.a. vore samarbeid, samlingsutvikling, litteraturformidling, transportordning og nye lokale/oppussing av eksisterande lokale.

Fylkesbiblioteket sende framsyninga "Den unge Sigrid Undset" ut på turne til 5 kommunar, det var 174 tilskodarar. Turneen var støtta av Norsk kulturråd og Folkeakademiet.

Fjernlån. Fylkesbiblioteket lånte i 2011 ut 2 912 (2010: 2 782) bøker og anna materiale til andre bibliotek som fjernlån. 2011 er siste året fylkesbiblioteket sjølv driv fjernlån

Klassesett. Fylkesbiblioteket har ei samling klassesett, med vekt på nynorske litteratur, og lånte ut 3 786 bøker til skulane, mot 3 019 året før.

Bokbåten reiser ut ein gong i oktober/november, og ein gong i februar/mars. Kvar tur er på 17 dagar. I 2011 lånte ein ut 13 829 bøker, mot 13 563 året før. Vel halvparten av utlånet var barnebøker. Bokbåten hadde 2 244 (2010: 1 979) personar om bord. Det var 1 758 (1 492) tilskodarar på 60 kulturarrangement om bord i båten. Bokbåten vitja 17 kommunar og hadde 41/39 stopp på kvar av turane.

Bokbussen lånte ut 5 844 (2010: 11 749) bøker i 2011, men drifta vart avslutta 19. mai som følgje av Fylkestinget sitt budsjettvedtak i desember 2010. Bokbussen vitja 5 kommunar og hadde 21 stopp, som kvart blei besøkt 4 gongar dette halvåret.